

【经文信息】大正藏第 46 册 No. 1946

金光明最胜忏仪 1 卷

No. 1946 [cf. No. 1945]

金光明最胜忏仪

宋传天台教观四明沙门知礼集

一切恭敬。

一心顶礼十方常住三宝(一拜已胡跪执炉云)。

愿此香华云。遍满十方界。供养一切佛。尊法诸菩萨。声闻缘觉众。及一切天仙。受用作佛事 供养已一切恭敬(一拜已复跪奉请云)。

一心奉请南无本师释迦文佛。东方阿閼四 佛世尊。宝华璫璃宝胜佛等。尽金光明经中及十方三世一切诸佛(三请一礼)。

一心奉请南无大乘金光明海十二部经(三请已一拜)。

一心奉请南无信相菩萨。观世音菩萨。大势至菩萨。金光明菩萨。金藏菩萨。常悲法上尽金光明经内及十方三世一切菩萨声闻缘觉贤圣僧(三请已一拜)。

一心奉请南无大梵尊天。三十三天护世四王。金刚密迹散脂大将。大辩天神。摩利支天。韦驮天神。坚牢地神。菩提树神。诃梨帝喃鬼子母等五百眷属。一切皆是大菩萨等。及此国内名山大川一切灵庙。当州地分属内鬼神。此所住处护伽蓝神守正法者。一切圣众(三请已不应礼)。

一心奉请南无第一威德成就众事大功德天。

(此位众唱三请已不礼。白衣须礼。当合掌持呪)。

南无室利莫诃天女 怛侄他(侄字徒细地夜儺也。三曰并通)钵唎脯[口*律]拏折囉
(脯布乎切。[口*律]力出切。折市列切。囉力计切。四并同之)三曼[多*页](多可切)
达喇设泥(喇字多达切。泥字去声) 莫诃毘 阿啰揭谛 三曼[多*页]毘昙末泥
莫诃迦哩也钵唎底瑟佉钵泥(佉丑迦切) 萨婆頹他娑弹泥(頹乌割切)苏钵唎底脯
囉 痾耶娜(娜乃可切) 达摩多 摩诃毘俱比谛(比婢必切) 莫诃迷咄嚕邬波僧
呬羝(邬乌古切。呬香器切。羝了兮切) 莫诃颡唎使(颡户结切) 苏僧近(入声)哩呬
羝 三曼多颇他 阿奴波唎泥莎诃(七遍讫。一拜起同声叹云)

佛面犹如净满月	亦如千日放光明
目净修广若青莲	齿白齐密犹珂雪
佛德无边如大海	无限妙宝积其中
智慧德水镇常盈	百千胜定咸充满
足下轮相皆严饰	毂网千辐悉齐平
手足缦网遍庄严	犹如鹅王相具足
佛身光耀等金山	清净殊特无伦匹
亦如妙高功德满	故我稽首佛山王
相好如空不可测	逾于千日放光明
皆如焰幻不思议	故我稽首心无着

(赞已当陈述意。须合掌恭敬。令众平声三唱云)。

南无宝华璠璃佛。南无大乘金光明经。南无第一威德成就众事大功德天(如是三称已。次处奉供养。专想面对。后陈辞句。余时除去。饮食并净洁如法。复持散掷等语。但云香华至同圆种智而止。便即礼佛)。

今我道场敷设供养。然种种灯。烧种种香。奉种种饮食。净洁如法。恭持奉供诸佛世尊。大乘经典。菩萨贤圣一切三宝。又复别具香华饮食。奉献功德大天大辩。四王梵释。天龙八部圣众。复持饮食散掷余方。施诸神等。惟愿三宝天仙。怜愍于我及诸众生。受此供养。以金光明力及诸佛威神。于一念间显现十方一切佛刹。如云遍满如雨普洽。广作佛事等熏众生。发菩提心同圆种智(此亦应随意所陈。未必专诵此语。作是语已。当持饮食至道场外净处。布散四方。先作是言)。

我今依教供养大乘三宝及吉祥大天。持此种饮食。散洒诸方遍施诸神。愿诸神明威权自在。一念普集各受法食。充足无乏身力勇锐。守护坚强知我所

求。愿当相与回此福利普润含生。果报自然常受胜乐(作是祝愿竟。即便以食散掷四方。想无量鬼神悉来受食。尔时或诵前呪。或但云南无室利摩诃天女。以食尽为度。散洒毕回道场礼佛)。

一心顶礼本师释迦牟尼佛。

一心顶礼东方阿閼佛。

一心顶礼南方宝相佛。

一心顶礼西方无量寿佛。

一心顶礼北方微妙声佛。

一心顶礼宝华璠璃佛。

一心顶礼宝胜佛。

一心顶礼无垢炽宝光明王相佛。

一心顶礼金焰光明佛。

一心顶礼金百光明照藏佛。

一心顶礼金山宝盖佛。

一心顶礼金华焰光相佛。

一心顶礼大炬佛。

一心顶礼宝相佛。

一心顶礼尽金光明经中及十方三世一切诸佛。

一心顶礼大乘金光明海十二部经(三礼)。

一心顶礼信相菩萨摩诃萨。

一心顶礼观世音菩萨摩诃萨。

一心顶礼大势至菩萨摩訶萨。

一心顶礼金光明菩萨摩訶萨。

一心顶礼金藏菩萨摩訶萨。

一心顶礼常悲菩萨摩訶萨。

一心顶礼法上菩萨摩訶萨。

一心顶礼尽金光明经内及十方三世一切菩萨摩訶萨。

一心顶礼舍利弗等声闻缘觉贤圣僧。

普为法界一切众生。悉愿断除三障。归命忏悔(一拜运想逆顺十心)。

我比丘(某甲)归命顶礼现在十方一切诸佛。已得阿耨多罗三藐三菩提者。转妙法轮。持照法轮。雨大法雨。击大法鼓。吹大法螺。建大法幢。秉大法炬。为欲利益安乐诸众生故。常行法施诱进群迷。令得大果证常乐故。如是等诸佛世尊以身语意。稽首归诚。至心礼敬彼诸世尊。以真实慧以真实眼。真实证明真实平等。悉知悉见一切众生善恶之业。我从无始生死以来。随恶流转。共诸众生造业障罪。为贪嗔痴之所缠缚。未识佛时。未识法时。未识僧时。未识善恶。由身语意造无间罪。恶心出佛身血。诽谤正法。破和合僧。杀阿罗汉。杀害父母。身三语四意三种行。造十恶业。自作教他。见作随喜。于诸善人横生毁谤。斗秤欺诳以伪为真。不净饮食施与一切。于六道中所有父母。更相恼害。或盗宰堵波物。四方僧物。现前僧物。自在而用。世尊法律不乐奉行。师长教示不相随顺。见行声闻独觉大乘行者。喜生骂辱。令诸行人心生悔恼。见有胜己便怀嫉妬。法施财施常生悭惜。无明所覆邪见惑心。不修善因令恶增长。于诸佛所而起诽谤。法说非法。非法说法。如是众罪佛以真实慧真实眼。真实证明。真实平等悉知悉见。我今归命对诸佛前。皆悉发露不敢覆藏。未作之罪更不复作。已作之罪今皆忏悔。所作业障应堕恶道地狱旁生饿鬼之中。阿苏罗众及八难处。愿我此生所有业障皆得消灭。所有恶报未来不受。亦如过去诸大菩萨修菩提行。所有业障悉已忏悔。我之业障今亦忏悔。皆悉发露不敢覆藏。已作之罪愿得除灭。未来之恶更不敢造。亦如未来诸大菩萨修菩提行。所有业障悉已忏悔。我之业障今亦忏悔。皆悉发露不敢覆藏。已作之罪愿得除灭。未来之恶更不敢造。亦如现在

十方世界诸大菩萨修菩提行。所有业障悉已忏悔。我之业障今亦忏悔。皆悉发露不敢覆藏。已作之罪愿得除灭。未来之恶更不敢造(忏悔已归命礼三宝)。

我比丘(某甲)归命顶礼十方一切诸佛世尊。初成正觉未转法轮。欲舍应身入涅槃者。我皆顶礼是诸世尊。劝转法轮请久住世。度脱安乐一切众生(劝请已归命礼三宝)。

我比丘(某甲)归命顶礼十方一切诸佛世尊。我今随喜一切众生三业所修施戒心慧。二乘菩萨贤圣善根。十方诸佛证妙菩提法。施一切所有功德。我皆至诚随喜赞叹(随喜已归命礼三宝)。

我比丘(某甲)归命顶礼十方一切诸佛世尊。愿作证知。我从无始至于今日。三业所修一切诸善。施戒善慧。乃至忏悔劝请随喜。摄取现前。回施法界一切众生。同证菩提如诸佛等(回向已归命礼三宝)。

我比丘(某甲)归命顶礼十方一切诸佛世尊。证我微诚现前所愿。愿诸天八部增长威神。常来护持我此国土。风祥雨顺谷果丰登。圣帝仁王慈临无际。群臣官属常守尊荣。万姓四民永安富乐。佛法檀越父母师僧。历世冤亲法界含识。咸生正信发菩提心。六度齐修二严等备。复愿我等众圣冥加。常值大乘及善知识开我佛慧。愿行现前荷负流通。三世佛法诱化一切。然无尽灯普会众生同归秘藏(发愿已归命礼三宝)。

南无佛。南无法。南无僧。南无本师释迦牟尼佛。南无四方四佛。南无宝华琉璃佛。南无大乘金光明经(三称)南无信相菩萨。南无金光明菩萨。南无金藏菩萨。南无常悲菩萨。南无法上菩萨南无第一威德成就众事大功德天。

自归于佛。当愿众生体解大道发无上心。

自归于法。当愿众生深入经藏智慧如海。

自归于僧。当愿众生统理大众一切无碍。和南圣众。

金光明最胜忏仪

【经文信息】大正藏第 46 册 No. 1946 金光明最胜忏仪

【版本记录】CBETA 电子佛典 Rev. 1.6 (Big5)，完成日期：2009/04/23

【编辑说明】本数据库由中华电子佛典协会（CBETA）依大正藏所编辑

【原始数据】萧镇国大德提供，北美某大德提供

【其他事项】本数据库可自由免费流通，详细内容请参阅【中华电子佛典协会数据库版权宣告】
